

澤雅堂詩二集

澤雅堂詩二集卷十一目錄

寄凌子與揚州

蜀人張炳華隨沙星使分界至喀城以近詩見示  
作此贈之

福之足疾作此調之

春風

歲暮與子相

同子相福之至虛隨園看花傑堂軍門置酒款之  
邀子相作詩貽傑堂兼與福之別

送沈福之還吳

再送福之

庭樹

紀行十四首

馬上聞吟

放歌

答寄藍州蘄水適讀山谷詩卽效其體

疏勒城外人家栽蓮開花

新室落成有作呈朗公

秋花

二更

澤雅堂詩二集卷十一

烏程施補華均父著

寄凌子與揚州

一別十三年此別最長久別時壯士顏忽忽今老醜牙  
齒漸動搖蒼髭承皓首萬里崑崙墟高揖西王母孤心  
雄千夫身在千夫後咄哉繫驥足而縱驚駘走窮達我  
有天讒忌復何咎晚逢上將賢略分稱僚友奇節動相  
憐狂言頗能受咨嗟放筆文慰藉開缸酒病鶴風翱翔  
墮龍雲惱慘風雲一彈指變化無不有死灰生活火期  
望真難負此唯冰雪都實亦牛羊藪身熱地氣偏頭痛

山形陡民生父子恩德色到箕帚何論昆弟聞伯叔及甥舅寄穿牆可踰男女面不忸百年隸王人政治亦云苟舊風相與革輕典安可狃還防強敵矚益勵武夫赴籌邊向日心作奏如風手卻憶平生交於子倍親厚小時城東西十日覩面九愛子道氣深一編常在手性畏見要人甯與野夫偶子亦愛我豪熱血胸數斗謂當奮功名金印縛其肘蹉跎三十春幾日咲開口子仍失隊魚我尙喪家狗吁我五石瓠難作大樽剖怪子一叢桂未覓小山守揚州充市隱歲若受辛白王霸徒有兒列子難爲婦公事苦拘束一了脫械杻挑燈念遠人淅淅

風吹牖我股禹不毛子心佛無垢會合知有時但恐增  
衰朽寫圖贈古琴得句題新柳余與子與往事借問東飛鴻好  
事今能否

蜀人張炳華隨沙星使分界至喀城以近詩見示作此  
贈之

天山南北限華戎和議初成使節通人是乘槎張博望  
嶺爭分水沈存中謂沙星使務衫從事乘胡馬點筆題詩寄

塞鴻壯語清詞家學在船山自昔體裁工

書記翩翩塞上名馬前橫吹助吟聲層冰夜度千盤嶺  
碎葉朝尋一角城甌脫蒼茫思遠略刀環宛轉託離情

醉磨盾鼻揮文牘先有新詩脫手成

福之足疾作此調之

歲行萬有八千里雙腳塵泥初一洗竭來土室日呻吟  
十步真須夾兩婢昔何健捷今何弱王駘兀者幾希似  
天公有意惜犇波末疾相加俾休止不然大小兩頭痛  
路近名奇又探視條支安息千山通周流西極無窮已  
侵星犯露況徒苦功名或在閉門裏鯤鵬鸞鳩同一飛  
勝負何曾爭遠邇安坐時邀富貴來兩股無毛供咲詆  
斷馬二足車一輪道路飄零少游子雙腳從軍亦可憐  
蹙蹙當爲福之始歷塊一蹶我最傷晚隨跛鼈非慚恥

支離竟得十束薪災生翻恐跛能履跂跂莫哂善緣壁  
蜥蜴由來得龍體意行神游六合周夫子之足早瘳矣  
春風

春風爲我多情甚破例年年度玉關似報青山無限好  
相邀白髮幾時還吹花鐵馬金戈裏擘柳冰天雪海閒  
分得韶華來慰藉思鄉聊欲一開顏

歲暮與子相

臘鼓瑟瑟短景催好春消息隔年來聯翩寒鳥將翻羽  
次第幽花各抱胎竹馬兩行迎歲去草船三揖送窮回  
冰霜滋味今嘗盡椒酒從容共舉杯



同子相福之至虛隨園看花傑堂軍門置酒款之邀子  
相作詩貽傑堂兼與福之別

冬心一熱生繁華夢中桃杏先作花覺來春色尙在眼  
騎馬同過將軍家輕紅淡白真似夢高枝吐豔低含葩  
蜂蜨未知客已賞媿逢綸爛隨矜誇將軍愛客爲置酒  
酒酣欲去花相遮含愁待怨態婀娜傍花新柳如嬌娃  
殷勤試爲沈郎折別懷鄭重歸途還看花送客託吟咏  
竹山情語淒於笳將軍還邀藉草坐花閒汲水重煎茶  
花能解語定貽誚出門何處非天涯天涯春好且爲樂  
聚散豈足悲搏沙牆東石榴病半死樵斧幸護柯條加

孤根屈盤生氣在東風一洩抽萌芽春色闌姍綠陰滿  
想見丹蕊舒如霞花開各自應節候早秀何羨遲何嗟  
古來人事亦如此題詩字與飛花斜

送沈福之還吳

來時飛雪滿征鞍去日春光馬上看心繞松陵家萬里  
夢回蔥嶺路千盤故園兒女如花好絕域功名到酒闌  
鷗鷺相逢勞慰藉頻年孤負釣魚竿

再送福之

幾人自號報恩子一別轅門情態改覆手爲雨翻手雲  
憐才愛士心常悔君自長河西發源直送大江東入海

道路遙遙萬八千眼中定有崑崙在

庭樹

秋氣蕭蕭庭樹枝一番憔悴一番悲天涯不信春風到  
又見迴黃轉綠時

迴黃轉綠任人看閱歷邊城幾歲寒清陰不妨飛鳥託  
孤根長作臥龍蟠

粗枝大葉出檐斜亭午曛曛日影遮自養雪霜千歲幹  
不爭桃李一春花

紀行十四首

由喀什噶爾城西北行出克齊克明約路兩卡至廓

克蘇缺力克達坂屯木倫凡千數百里與俄國交界  
余奉幫辦軍務張公檄行視其地安撫各布魯特種  
人襍有所作錄之以代日記

赤水如赤龍蜿蜒崑崙來千折赴橋下轟訇鳴春雷跨  
橋起亭障立馬飛塵埃落日息行色孤煙生晚炊徒侶  
後先至香露傾玫瑰名酒酒酣短燭燧黃月光徘徊攬衣  
出行帳慷慨當語誰目盡萬山阻西極何遙哉條支與  
安息路似蠶叢開懷柔仰

廟略駕馭思邊才

克齊

孤驛雞一鳴月在萬山頂客心有途路晚睡得先醒咄

嗟飯易熟揮斤裝重整上馬晨光微春風吹面冷升高  
意獨戒就坦力羣騁須臾日照野人馬閃長影及關五  
十里中外此要領清濁水交迴東西地偏迴寬政通往  
來密指杜窺詞操筆語老兵勿謂烽煙靜克齊克至  
明約路卡

天晴午日薰人馬俱熱惱行客起三更還勝昨宵早嚴  
程限百里中路月低曉暮春如初冬彌望但枯槁沿流  
涉復涉一水百縵繞巖依廢壘斜坡占穹廬小牽羊再  
拜獻異種今馴擾童山無寸毛精氣內含好土膏交石  
髓融結成奇寶崑崙五金窟誰復數巖道茲阜乃旁出  
藏蘊亦不少鑿險役窮黎呈瑞思富媪何當普爾錢億

萬洪鑪造

明約路至  
安鳩安

平川浩無際水草亦云夥家家縱牛羊以牧代耕可種  
人生幸遂行客勞已頗四山初排列深入漸包裹平川  
忽迴隔亂石紛磊砢馬行亂石中蹶鐵熱併火仰首視  
層霄高峯危欲墮細路蟻羣旋陡崖猿一坐俯臨目眩  
轉直上心貼妥吁嗟九折坡天殆王尊我騎行易徒行  
下山更傾侈叢生馬蘭草紫翠吐花朵久別江南春對  
此覺婀娜沙坡設行帳清澗流其左敲枕聽水聲夢泛  
茗谿舸

安鳩安卡  
至堪蘇

山風忽倒吹硬雨擊人面塵霧合冥冥咫尺昏不見長

坂滑難登重裘寒欲戰迴折上懸崖下有千尋澗馬行  
容四蹶寸地無餘羨性命與天爭徒侶色俱變一奮倏  
已踰百險安能眩下坡復穿峽鼠穴人難慣暗憂石稜  
觸明覺天光炫出峽日已吐轉途風更便潺潺道旁水  
迅激若流箭笑指垂巖樹童禿今施鬻孤根著寒土堅  
瘦發蔥蒨解鞍得暫息睡味如酒醺從公萬里外甯敢

辭勞倦歸田誰不思乘障吾亦辦

堪蘇至無胡  
素魯克卡

絕壁轟寒空仰視巾幘落徑路一綫懸未上神已愕馬  
行如猿升有前更無卻孤石危欲動四蹶驚不著巔崖  
忽平坦翻得騁馳樂回首萬坡陀洶若海濤作風聲春

蕭條日色午淡泊直下八十里腸鳴飢火灼河流正空  
湧其下石磊砢水旋石亦轉人馬難插腳居民不出山  
混沌老未鑿卻識官長尊穹廬奉栖託代薪供馬矢充  
飯進羊酪告以分華夷一一守條約知天倚漢家畫地

安戎索

烏胡素魯克至  
烏魯克洽提卡

長行兩日休人馬息倥傯蕭然一書生穹廬勝鵝籠身  
如蛻骨蛇僵臥不思動小門東南開敲枕望坡隴牛羊  
時上下春草綠羣羣寒知山氣凝靜覺河聲洶徒侶亦  
已勞強起杯重捧連朝犯天險藉壓心魂恐老張熟邊  
事得酒言泉湧詳陳十年亂有若拙蠶蛹明朝山路襍



認我舊來踵募坡記沙虛度壑避雪擁識途誠足貴要

恃肝膽勇君家博望侯自古工鑿空

烏魯克  
治提作

危途穩作計騎馬如騎牛雖非追風才顛蹶誠無由徒

侶婉相勸其意厚且周聞言顧而哂君非達者儔華屋

設重茵珠簾珊瑚鉤牙牀巧雕飾文錦爲衾裯焚香金

鳴鑪二八蛾眉修參苓代茶湯列食皆珍羞微風不敢

御甯犯霜露愁養此千金體骨脆肉亦柔一朝蟲臂化

數盡天不留何必道路險始有性命憂江湖浪如山逆

風長操舟或者溺人笑曲港輕細流我來況王事乘險

非好游便當感山鬼雲霧扶行騶努力飲此酒忠愛宜

相酬明朝上葱嶺縱轡聊一收

烏魯克  
治提作

身經天險來崎嶇盡平坦坡陀屢起伏頗怪馬行緩碎  
石砌坡陀滑澁叅廉悍升高出樹表入暝度崖巖連山  
中外介擇路東西轉青林疏漸密碧湖清且淺漠漠遠  
川平茸茸新草短穹廬依水次初日牛羊散老人多垂  
鬚少婦工結辮蒸餅麥散窻點酪茶加碾殷勤知敬客  
分餉及徒伴百年充王人卽事見誠款

烏魯克治  
提至業耕

荒山多豺狼每作夜行戒上馬曙光中東巖日初挂徐  
行並鞭鐙徒侶閒通話迴紆得平曠飛騁聊一快布回  
有酋長新喜襲冠帶殷勤導先路老蹇馳不介中途且

休息巾裾拂塵盞後至乍攀崖前行已涉瀨趙生佳少年眼力諸人最山川尋脈絡牛毛入圖繪葱嶺水東西天設中外界狡夷踰嶺來尙欲分中外兒童地久習水草生所賴邊人于于至慰爾馬前拜朱崖固未捐盧龍

誰肯賣

業耕至愛里  
克什塘木

西南雪山白初日生於東晴光射絕壁幻作胭脂紅巖物出奇麗似慰征夫窮馬上吟新詩聲滿千巖中千巖忽已轉遂上積雪峰直下五百丈羶裏啞鄧鍾溝間石犖确冰下泉琤琮人語山應答天窄雙崖空豁然見開朗十里川原通我馬四蹶展天矯如游龍行帳臨洪河

入夢波濤洶白楊閒紅柳蕭蕭搖春風邊人逐水草聽

命多牛翁召翁置酒食相與談乾隆

愛里克什塘木至廓克蘇

天將昌我詩險外遣乘險寒色春蕭條曉向缺力峴初  
行渡洪河水惡馬蹏輒常恐墜旋渦命逐濤瀧轉懸崖  
得微路斷若燒餘棧神悽無猛赴毛立有危踐穿澗冰  
乍裂繞嶺雲未斂黑窺巖竇窄綠破草根漸北風吹倒  
人雪片晴空卷岡巒白無際途徑迷莫辨前趨深沒馬  
雙耳僅未掩雪光交日影晃蕩眼花閃重暈誰扶頭清  
淚紛流臉氤氳更寒瘴人馬同時喘江山助文字遷也  
實陋淺誰走崑崙墟一拾冰蠶繭笞兵我未暇萬里游

已忝歸持鋏力篇惡謔報誰儼

廓克蘇至鋏力克達坂

風來雪忽飛雲去日已吐須臾風吹雲日隱雪更舞冬  
春一刻變天意竟何主華屋綺羅人安識征途苦夷行  
神默愴猛上力交鼓吁嗟千峰頂現此閒曠土濛濛二  
十里綠草如平楚融雪地含膏流泉山潑乳誰思據牧  
場我欲遣民戶但縱萬牛羊鞭策相爾汝十年足生計  
自以禮義輔法度疏有方租稅寬無取懷恩激內誠守  
險捍外侮心繫北辰星目饒西域賈

屯木倫

少年住邱園出門纔百里親戚相祖餞三日治行李登  
途猶惘惘丁甯顧妻子半月絕家書懷念莫能止歸來

如遠客盡室皆歡喜焉知鬚髮白萬里馳不已少逸老  
轉勞誤我緣求仕孤坐復慨然勞逸甯挂齒安邊苟有  
方況瘁亦足抵百苦鍊心骨萬奇開眼耳鄉里下澤車  
少游非壯士巉巖叢壑閒幽幽深樹底息馬一徘徊冷  
泠聽流水窸然與境會愴爾已神啟新詩自長吟逸興  
春雲起

還烏魯克洽提  
過河移駐樹林

馬上閒吟

作紀行十四首意有未盡於馬上閒吟之行役之苦  
與山川風俗略見焉拉襍成章不靳工拙

山光樹色尙冥冥睡眠眼朦朧看曉星馬上坐如船上臥

一回簸蕩一回醒

葱嶺連天西復西紅襟雙燕逐風低如何拋卻雕梁好

來傍陰崖啄雪泥

途中所見

重岡複嶺路盤盤斗覺山風拂馬寒晴雪亂飛斜照裏

沾衣猶作柳花看

凍雨初歇寒雲晴山石犖确無人行陰林絕澗夕風峭

空外雪雞嘯一聲

筍輿聊欲就安便峭壁連雲細路懸百丈牽空唱邪許

上山疑坐上灘船

下山路傍溪斜鹵氣浮如雪映沙蕭蕭迎馬白楊樹

的的嬌人紅柳花

峭崖禿樹千年物  
半死半生勢盤屈  
孤根入石石抱根  
時有孫枝穿罅出

穹廬七八傍  
河干魂夢搖搖墮  
激湍山上雪花山下雨  
九春天氣十分寒

帳前山柳叢生而高綠成圍  
火急文書手一揮  
官馬莫欺胡

馬瘦冰崖雪澗夜如飛

鐵蓋山頭月色死  
雪片橫飛三十里  
老人猶說胡將軍  
躍馬生擒張格爾

荒林瘦石兩槎枒  
疲馬西行夕日斜  
一笑年來低着眼



尋春看到馬蘭花

山溪波浪響如雷  
兩兩穹廬著岸隈  
深處浮駝淺浮馬  
白頭誰見掉船來

牧羊移住重巖下  
春草初生水如瀉  
四山縱狗爲防狼  
百里騎駝堪代馬

白布纏頭兩瓣斜  
布回風俗婦持家  
密藏馬乳旋成酒  
細醪牛酥待點茶

父老傳聞事事新  
連城瓦屋似魚鱗  
山居只覺穹廬大  
半住牛羊半住人

部落零星繞澗岡  
朝朝羶肉與酸漿  
浮生不及隨陽雁

猶傍江湖食稻粱

雪鬢霜眉九十年猶能騎馬猛加鞭  
兒童記得城中事初鑄乾隆普爾錢

家具無多歲幾遷煖衣深谷冷平川  
山風吹黑嬌兒女始信城中出少年

椎冰鑿雪謁官人

聖代重逢日月新萬里一心依北極

乾隆皇帝子孫民

阿拉依庫頭人  
來謁仍求內附

執策重臨千仞岡岡頭亂石似羣羊  
馬蹏未緩客心急覺比來時山路長

萬山回首與雲齊一日東行一日低  
早悟置身千仞表也應攜得上天梯

朝卸輕裘午卸棉清和仍是夏初天  
從知上界高寒甚且住人閒五百年

放歌

醉時暫去醒時來舉酒澆愁愁未開  
一十二神主日夜安能俄頃無停杯  
春花解笑人嗟爾鬚鬢之白何爲哉  
萬事不如人計慮百年俱付天安排  
富貴赫赫如火如雷貧賤黯黯如塵  
如灰飄茵墮溷略相似非恩非怨風  
自吹火銷雷止塵亦散白骨一例埋  
蒼苔黃壚山下孤

魂相聚語甯有富貴之樂貧賤哀文字徒供蠹魚飽功名適遇鳩鳥媒仙之人兮抱長痛浩然一往不可回我生墜地乏羽翼排空馭氣無由追但當尸居龍覓順時運神明勿受牢愁摧躍冶之金不祥甚鼠肝蟲臂天機隨下土蒼蠅聲何以明我懷文繡衣牛冕見豕千歲曳尾泥中龜較量得失不足以觀化蒙叟徒逞荒唐才五旬之年萬里路久住自可歸亦佳騎馬出門去獨詣煙水隈笑問行路人君知我爲誰

答寄藍州蘄水適讀山谷詩卽效其體

壁上燈光殘未殘遺緘鄭重夜來看舊書百讀出新政

佳士一行爲好官寬恤荒年民減稅平反疑獄毋加餐  
歸裝盛得天山雪商略與君同歲寒

十年戎幕蟲黏壁一笑官場魚中鉤歸與酒徒窮日夜  
老餘詩筆敵公侯乘船星宿沙中海騎馬崑崙天外邱  
悠悠鄉里忽頭白驚聽狂夫談壯游

阿詒眞與阿寅同生子癡頑媿兩翁百里付君春雨潤  
九遷期我晚霞紅濟時大事手能了傳世浮名心未空  
衰髮自嗟豪氣在難成仙佛易英雄

疏勒城外人家栽蓮開花

疏勒城東官道斜芙蓉一池初吐葩纏頭百歲眼未見

但驚水面浮紅霞老夫來看日將出煙光露氣秋無涯  
銀塘玉井嗟何處萬里飄零君子花

新室落成有作呈朗公

所居之後院有屋陋且卑東與庖廚連旦晚聞蒸炊擔  
薪與汲水人聲嗚以嘻其北大樹立半死高高枝下拓  
地五弓藩溷實在茲屋內相襍處短牆各開之門戶四  
面啟法效蜂窠爲俯仰久不適決意拚修治排牆抉門  
戶曠蕩功乃施木石取自官斲匠及坊師時出酒食犒  
佐之以私貲向南成特室廣二丈有奇窗牖極摩豁中  
嵌青琉璃磨輒砌之地翠巒鋪四齊於上設賓榻枕簟

皆合宜兩旁置几案潔靜無華滋懸壁古字畫黝然生  
光輝外繞小迴廊曲折通東西築垣隔廳事戶作圓月  
規主人公退坐萬卷供探窺好客來清談往往庭日移  
夜風燈火閃曉露花木垂湫隘此一變自覺神明怡旁  
有心計人吃吃頻笑啗萬里數歸日君住能幾時勤費  
付後來作計甯非癡我論固不然官舍何異私一日苟  
未去營繕勞勿辭內外就整頓後來良足資我勞人得  
逸豈不念所貽卽令好改作規模可因依易於平地起  
茫然無寸基抑或化平地成毀物有時我但爲其成安  
知毀者誰百事如是觀衍作新居詩質之錢唐公當亦

頷其頤

秋花

秋花戀秋士的的映闌干卻抵三春豔能支八月寒感  
時將晚暮吐秀太艱難風露亭亭立應無熱客看

二更

二更初轉四窗開官燭熒熒夢未催落葉搖空風旋起  
浮雲吹盡月飛來家書著眼平安字邊事經心踈趾才  
一笑小屏僵倦僕坐聞鼻息已如雷



澤雅堂詩二集卷十二目錄

秋感八章

無情

此翁一首答故鄉諸子

人事

寄潤之書附題

有懷孟威觀察奉寄

宿野人家早起送客

有感東張祥舲

送萬湘舟清傳東歸

夢回湖州遊道場山寺作詩醒記六句足成之

癸未九日

書憤

寄純客農部四十二韻

秋感五章

福之夏口書來

渭臣軍門以自壽詩見寄索和依韻贈之

五言排律一百韻贈孟威觀察

有感

感事二首

與白五齋遇道太史飲酒

贈五齋

歷翁

張梅杭戎置叱馭圖

生日朗公置酒作賀賦此

甲申

與朗公夜話

春風

感事

昨夜春風甚狂羅氏園桃梨作花盡吹落矣

過羅氏園感懷孟威

遙哭許雷門師

送春

幕府

澤雅堂詩二集卷十二

烏程施補華均父著

秋感八章

露重風高畫角哀無邊秋色自西來  
年光欲駐駒驚過鄉夢初成雁叫回  
文字青鐙如負債關山白髮媿憐才  
上書儻許陳時事一寸丹心尙未灰

準部回疆萬里遙

皇威重振敵猶驕璧完空據山河險  
俄人交還伊犁甌脫仍爭

水草饒阿爾台山哈巴河事坐藏僧拋承化寺  
謂格根喇嘛換防兵記

納仁橋納仁橋向爲伊犁喀什噶爾換防兵間道籌邊遠賴乘槎使

黃屋經營閱

五朝

國書鄭重好交修節鉞依然鎮上游軍禮每邀牙將說

夷情常向舌人求貧民度歲三鍾粟退卒屯田十具牛

八屯之外皆設兵屯安得平分疏勒水烏孫城下飲西流謂朗公節帥駐

喀什噶爾也

烏孫回首勢孤懸近與丁零屈射連叛將似聞餘李緒

謂馬振威等好官何處覓任延馬留零落依門戶謂駐防各旗狗

盜招搖過市塵一樣蘇州金粉麗昇平難問道光年伊

承平時極繁盛謂之小蘇州

安邊有策富強資萬廩千倉食可支棉吐雪花思抱布

吐魯番草  
棉最盛

桑鋪雲葉算抽絲

八城皆有桑樹當事  
辦理蠶織已四年矣

玉河

吐氣精華聚銅穴流膏鼓鑄施

拜城葉爾羌  
皆有銅礦

地利將興

人事待功成終賴吏無私

滿目猶成化外民百年軍府太因循別推歲月稱回歷

纏民皆用  
回回歷

羞改衣冠學漢人萬事盡從胡達判

纏回呼  
天爲胡

達

一鄉唯有阿渾親

阿渾之權與阿奇木伯克  
等每援天方經典斷民事

語言文

字都殊異郡縣何時政治新

黎氏凋亡阮氏微兵威又逞佛郎機

聞法蘭西  
兵入越南狼頭始

悟遙相射

去冬彗星  
如匹練

蝸角何堪大合圍六詔通商江路

熟

緬甸已設英吉利馬頭  
緬與滇同一瀾滄江

三韓待覺海波飛

日本有佔朝鮮意

側身天地猶多事難卸西征將士衣

十稔蹉跎萬里遊五湖煙水負沙鷗交情尙許推心置

謂朗公節帥

世故將成繞指柔墓何年悲老大管兵無日

乞歸休功名要待天分付日者安知似馬周

相士謂余五十後晚

達

無情

無情歲月堂堂去眞到蒼顏白髮時捉鼻謝安知不免

輸心杜老莫相疑病花得露開偏好倦蜨迎風舞更奇

獨倚闌干觀物變旁人應識我爲誰



此翁一首答故鄉諸子

紫髯聊復隨名將白面何堪逐少年  
入幕肯令公喜怒閉門時與我周旋  
徒戎有論還憂國貢子無詩但信天  
書卷堆牀花繞砌此翁懷抱自超然

人事

自有春蘭竟體芳十年老女薄新妝  
天心暗裏安排定人事閒中感慨長  
良馬近依孫伯樂真龍終駭沈諸梁  
商彝周鼎無顏色康瓠輝輝卻在堂

寄潤之書垞題

貧家埽地淨如鏡紙閣蘆簾初日映  
寡母織布兒讀書

人戶人人起恭敬眼前富貴春花紅要須保惜貧家風  
夜思三十餘年事含淚封書寄阿同

有懷孟威觀察奉寄

西域新開郡邑遙繡衣錦節仰清標三巴傳檄文堪作

八月觀潮病卽消公因病辭任作此留之行化白題歸禮讓待登

黃髮問漁樵條支安息欽威德琛賚還憑達

聖朝

清宵獨坐漏聲長筆有鋒稜劍有鋸道德缺然猶氣誼  
功名老矣且文章喜談鄉社雞豚會羞逐衙官雁鷺行  
天半客星終黯淡難隨卿月比輝光

宿野人家早起送客

荒雞三度唱缺月四更看露草懸朱實風林戛翠寒  
駝鈴遠鞴鞞牛舍半摧殘待曉送行客郊墟聊解鞍

有感柬張祥舫

胸次新添萬壑冰山川了了說堪憑何須作掾工三字  
竟欲箋詩入九能建議疑成移竈婦游方笑似打包僧  
行吟更遠輪臺路奇句嘉州得未曾

山頭阿耨水渾渾親見黃河第一源我亦書生空弔古  
年來邊將已承恩賦詩聊復叅蠻語著論唯應號罪言  
數頁按圖他日事

鴻羽堂詩二集卷十二  
四  
乾隆皇帝

聖元孫

送萬湘舟清傳東歸

萬里西來十日留一燈話別去悠悠津梁疲矣客心苦  
草木蕭然天氣秋魚悔中鉤何日脫蟻工旋磨幾時休  
東歸若過吳興路爲道相如已倦游

夢回湖州遊道場山寺作詩醒記六句足成之

兩腳經行三萬里十年不見道場峰青春過了筍成竹  
白首歸來鱗滿松廚篋暗迎幽澗水塔鈴遙答破樓鐘  
夢回疏勒城頭月猶覺衣巾溼翠濃

癸未九日

萬里之外黃花秋扶病登高人白頭事常八九不如意  
酒有十千聊解愁鄉國茫茫雁南度山川了了水東流  
依然杜牧攜壺興已矣莊生越俎謀

書憤

雙持絳節向天涯割地和戎議太乖疆域正思分赤縣  
朝廷何意棄朱崖上游合據山河險生計交爭水草佳  
擬學虞卿折樓緩著書窮老已安排

寄純客農部四十二韻

作客叨青眼爲郎漸白頭十年魚海別萬里鳳城秋位

枉軍諮忝名虛庫部優關山飛檄急衣食賣文酬野寺  
曾依託官書其校讐閉門春草長比舍夜鐙幽誤字思  
常得高談病不休人遭劉四罵詩許魏三留秋榜聯翩  
喜春闈蹭蹬愁君因奉朝請我欲試兵謀粉署辭仙侶  
金城謁壯侯居然視岑范不獨重枚鄒遂與新疆役誰  
分上相憂將荷聊作柱借箸且爲籌牧地游魂散交河  
戰血流持糧三月足破竹八城收報效憎腸熱周旋媿  
舌柔敢邀軍賞列方避射工仇命定居磨蝎機生變狎  
鷗辟書從出塞罪狀自經溝臣儻如蟣蝨風何及馬牛  
深文羅密布偏聽杼驚投舉舉彈章上申申謫宦尤今

公湖海客遇我弟兄儔  
蘭芷芳終在龍蛇道  
可由關防巧鸚鵡  
愛惜病驂騮  
五稔依帷幄  
三軍擁戟矛  
雲銷月皎皎  
風息水悠悠  
意氣過嚴武  
功名望馬周  
九邊身未老  
百練骨逾遒  
分水猶爭嶺  
籌邊尙倚樓  
畫灰叅部署  
把酒話林邱  
白雁聲初動  
黃花蕊已稠  
登高情悵惘  
懷舊義綢繆  
槎或天邊返  
簪還日下抽  
桑麻閒治圃  
吳越近通舟  
小婦工調食  
嬌兒解學裘  
一瓶堪互借  
十石正新斲  
論效潛夫著  
奇偕老衲搜  
率真言相狗  
作健笑扶鳩  
墟墓留堅誓  
衣冠謝貴游  
勞勞蟻旋磨  
未悟此生浮

秋感五章

四十九年秋天運纔一瞬人自解笑嘯已遶霜摧鬢天  
翁下視人何異朝榮薜躑冶金不祥大化理宜順苟得  
勿自羞在茵亦同溷獨念百年中心退道應進東水無  
西流沒世空懷恨

微蟲吟惻惻甯挽天地秋要知蟲之心實爲霜露愁西  
方有孤士衰白不自謀夜坐一室中若抱無窮憂憂極  
忽起嘆日月如波流咄咄蜉蝣子安能識其由

幽人庭院空看菊常起早愛汝淺清霜不在顏色好桃  
李嬌春風零落無人掃稟茲貞秀姿開及秋光老含苞  
半未折芬芳滿懷抱榮華各有時歲晏期相保



昨日不再還今日又將去義和急揮鞭未肯須臾駐歸  
雲已向山倦烏方樓樹既昏且休息晨興親百務光陰  
愛目前往者何由顧百務一朝成天爲補遲暮明日亦  
須臾毋使蹉跎誤

歲寒誠可感亦愛氣澄清霜露朝淒淒百果皆秋成我  
將落其實甯復惜華英薦之瑪瑙盤入手芳甘盈過時  
不及采斜陽嗟西傾蕭蕭風動樹墮地紛縱橫

福之夏口書來

思君六幅峭帆張夏口遙遙向武昌千里江山銜落日  
萬家樓閣倚秋光泐湖東去鄉園近渤海西來驛路長

好作新詩酬遠信霜天飛雁正成行

渭臣軍門以自壽詩見寄索和依韻贈之

白帝烏蠻萬里天橫戈躍馬記當年功成

恩遇欣三接老去威名動九邊地祿羌戎兵用壯才兼

文武將稱賢射堂鈴閣清如水坐看金鑪裊篆煙

論兵校射一時豪暇接詞流意興高每遇題詩驚橐筆

尙如臨陣出韓刀書成風雨才何快劍吐虹蜺氣不韜

老我一園銷歲月看人萬里擁麾旄

聯翩將帥起三湘出塞旌旗道路長一戰功名收鷓部

九卿尊寵列鸞行嘶風馬怒槽甯戀行雨龍歸鉢可藏

他日凌煙高閣裏畫圖褒鄂有輝光

長城安足限胡秦正賴將軍細柳真龍節虎符安玉塞  
蠻花犵鳥話銅仁窮邊城郭泉偏好前輩園亭木亦珍  
笑指菊花呼壽客九秋幻作十分春

五言排律一百韻贈孟威觀察

問俗西戎外承

恩北斗邊風行持錦節日出比華年舊部熊羆猛新衣  
獬豸鮮歡聲動行伍政體肅班聯電掃烽塵淨星羅郡  
邑連天心化夷夏

帝命重旬宣弱歲詩書習清門伯叔賢聰明多解悟孤

露得哀憐湘浦名潛起羅山學再傳藝林如定價闈苑  
合登仙竟困高才試安能壯志捐十家孫子注五夜祖  
生鞭拙守誠聊爾飢驅亦惘然浮舟青草遠作客赤城  
偏局促無餘步迴翔但小鴛冷吟天姥月聞訪國清禪  
推薦中丞切征誅上將專片帆離浙水匹馬下秦川役  
豈轅門聽賓還幕府延輿圖觀了了書記助翩翩走也  
支離德時乎會合緣棋評消晝坐茶語誤宵眠碧血同  
尋碣黃流共踏船交親異蛩鉅情慕等夔蛇內地生機  
復新疆亂氣纏蛟蛇贖淵藪門戶失關鍵強敵招邀至  
腴區占據全人言撫而有相曰擊之便輓粟飛芻繼椎

冰鑿雪前劉公今謝艾回賊漢先零鄉望誰遺此軍諮  
實賴焉快馳千里馬幸遇九方歎大漠踰蒼莽陰山度  
蜿蜒雄師天上落黠虜目中懸縛袴揮兵急排囊決陣  
先羣凶狐假虎一敗雀逃鷓埽穴虞旁出擒渠效左牽  
義應刈蓬藿仁尙舍蜚蜮戈戟王庭集腥臊牧地湔火  
州方席卷木壘又旗舉破竹收屯堡攀禾越陌阡計窮  
和藥進戮慘閱牆駢迎刃狼頭倒彎弓鵲眼穿枯泉涌  
疏勒汗壁洗于闐逸寇行搜捕疲軍立配墳鯤鮪樂魚  
海蠻觸定蟲天納叛鄰非善安民吏待銓邊庭正儲帥  
帷幄久居權節自承韋叡刀將付呂虔尋源阿耨井考

貢扇寶璫絕塞登臨少名園景物妍繞垣流瀨瀨夾路  
草芊芊嬌杏纔回靨柔桑乍折拳成陰鋪綠嫩交萼吐  
紅嬌曲沼萍浮岸幽廬蘚上輒築亭疑艦裏架閣出林  
巔勝集時陳伎嘉賓並駐駟楚歌餘慷慨胡舞雜踴躍  
嘯樹禽知媚窺窗蜨最儂酒香聞越釀詩好寫巴箋雲  
幕朝分騎霜舉夜試吹虹蜺光舉火霹靂響抨弦勇突  
翻投穽驚犇盡入筌鬪來兼赤手負去欲頰有溫宿資  
移鎮伽師告折還變夷探本本保力事捲捲招聚流亡  
戶開除斥鹵田高原引溝澮下等稅園廬殿馬懲徵草  
鄉蠶免貢綿勸栽成列樹飭鑄比輪錢清野郵筒速歸

墟販鼓齎儒書髦士講漢語舌人詮修築工頻減平反  
獄細研疑年絳人算赦罪泄公篋鬼國商猶恤天方教  
可泊綱維關赤緊混沌關黃顛形役能無瘁神完未是  
屏觀潮宜灑練鑑井莫跣躡靜絕三彭擾虛辭六鑿挺  
憑將濟時策衍作養生篇而我攜詩筆從公赴酒泉謀  
猷常代決倚信亦云堅比舍嗟薪積循牆忽鼎鑄徒存  
如矢直未辦破觚圓東閣終恢度南箕已應躔含沙孤  
影射下石巧言譏易躡防因堙非祥戒察淵拚爲可離  
苟恥號耐彈棉鍛鍊遭嚴劾涵濡獲下遷情淒同隊鯉  
聲咽別枝蟬氣合吟雙劍心哀奏獨茲傷痕養麒麟病

色護蘭荃吠息狺狺犬飛看跼跼爲據鞍撫劉髀覽鏡  
感馮顛巨嶽包低阜洪流納細涓相余瞳炯炯視俗脰  
瘡瘡好舞梳翎鶴休醫縮項鯁誰堪任梁棟世肯棄楠  
櫬請布鴻漸卦從登燕喜筵平生擬張仲孝友恐多愆  
有感

邊愁入雙鬢覽鏡盡成絲尙負飛騰氣空悲老大時合  
離雲不定憂喜烏何知招取崑崙月聽余夜詠詩  
日日籌歸計淹留又一年安危甯寄我去住尙關天夢  
落五湖水風吹萬斛船醒來鏡照壁長夜意茫然

感事二首



垂簾延納意立仗諫爭姿彈擊初無諱清明合有時從  
來作鸞鳳不遣問狐狸

國計關強弱從容一論之

越裳朝貢國寇患與年深但守和戎計終乖字小心水  
師猶有將火艦況如林一戰安黎阮揚威請自今

與白五齋遇道太史飲酒

蓬萊仙人騎赤鯉西過黃河四千里蘸筆題詩疏勒城  
墨池翻動昆侖水疏勒城中歲欲闌沈沈戎幕一尊歡  
關山其說窮邊苦風露休辭上界寒

贈五齋

我身苦乏神仙骨，船近蓬萊風陡發。歸把平生一片心，  
來試崑崙萬古雪。蓬萊散吏下界遊，今年亦到崑崙邱。  
相逢共話海天事，百變魚龍聽者愁。琪花瑤草催歸去，  
歷歷蓬萊舊行處。香案他年侍玉皇，應言下界多塵霧。  
歷翁

白首功名說歷翁，一尊猶覺氣如虹。風前秋樹思春綠，  
霧裏朝陽待晚紅。陳几試開芻狗篋，揚箕已息斗牛宮。  
天時人事終難料，鼎鼎華年逝水東。

張梅杭戎置叱馭圖

君材快似千里駒，世事難於九折阪。十年身犯百險來，

操縱自如心手穩畫圖寫生三尺長此人此馬宜戎鬪  
冰嶺連天夏日死揚鞭一笑行康莊

生日朗公置酒作賀賦此

甲申

青尊紅燭酒微醺白髮今年足九分春到人間思好雨  
老來天畔約歸雲買田計遂輕求祿出塞詩傳傲策勛  
竹裏行廚花下馬未能禮數敵將軍

與朗公夜話

窗鏡連夜豔生花似報歸期漸有涯愛

國心深頻望闕籌邊事了暫思家青山舊約人人負白  
髮

新恩歲歲加將士何時齊奏凱詩成吾欲付胡笳  
吳興城外水如天處處汀洲著釣船挈鷺提鷗宜送老  
呼鷹躍馬與防邊窮人終少封侯相絕域應留喫飯緣  
要寄親朋書數紙今年乞得買山錢

漫誇談笑靜西戎橫海樓船萬里風恐誤善刀藏櫝計  
又成強弩射潮功山光水態宜塵外人事天時亦意中  
燭炮酒闌雙耳熱從公天下論英雄

春風

鱗鱗新水動迴谿細雨如塵不溼泥一樣江南楊柳綠  
春風吹遍玉關西

感事

火艦縱橫舊約違

詔書深罪佛郎機扶胥水上兵初合黎母山前海欲飛  
獻雉何年循職貢斬鯨他日振軍威天涯要挽弓如月  
仰射蚩尤五丈旂

起家將帥聯翩出沿海關防次第齊軍事最虞驚孽雁  
夷情應識困連雞

三朝宵旰憂蛇豕一戰存亡繫阮黎林邑功名媿宗懋  
白頭留滯玉關西

昨夜春風甚狂羅氏圍桃梨作花盡吹落矣

東風有情花弄色輕吹十日花如織東風無情花泣紅  
狂吹半夜千枝空花開花落風爲政封家阿姨反覆性  
中有數株花未開風搖不墮含奇胎老夫看花一尊勸  
風爲花恩爲花怨安得連朝寂不吹晴雲暖日過花時  
過羅氏園感懷孟威

寒食清明春已深小桃將萼柳初陰晚開晚落花何恨  
半醉半醒人獨吟吾輩略如閒草木故鄉孤負好園林  
繞廊新水冷冷響還似當年子敬琴

遙哭許雷門師

窮巷有孤童懷書涕淚中飢寒傍慈母訕笑到鄰翁招

就諸生列因言一顧空西齋桃李樹三十五回紅  
羣盜南來急公車北上初十年淹客路百戰斷家書老  
病功名薄妻孥患難餘空城氣蕭瑟時叩閉門居  
甲戌春三月扶藜送出門吁嗟念將老鄭重託諸孫白  
拾遺初服青山媿昔言不知文字社耆舊幾人存  
除我庭幃望先生望最深升沈游子命憂喜老人心歲  
月眞催晚兒童直到今異時來表墓種樹已成林  
白首爲師弟相期其歲寒八行書尚溼萬里淚難乾舊  
學隨年廢遺文量力刊天涯老從事媿作李翱看  
天付貧人命艱難氣自平身閒負暄坐詩好忍飢成苦

境多心得陰功證耳鳴阿長年十五犀角正豐盈

長保先生

次孫

### 送春

自我崑崙邱畔住春風五來還五去春風來去爲羈人  
略作繁華慰遲暮春風春風誠有情曷不留此功名成  
上消千巖太始之積雪下釋萬壑無垠之陰冰坐令三  
十六國百昌生胡天氣候漢地平不然與我作歸伴入  
關一路韶光滿今年且去明年來兩計待決休徘徊

### 幕府

幕府文書有底忙風流頻接令公香耽詩中酒青春晚



乳燕鳴鳩白日長回首鄉園花似雪側身天地鬢如霜  
年華易逝功名薄孤負生涯八百桑